

29/06/2002

Pemuda, Wanita MCA sokong Abdullah

PERHIMPUNAN Agung Wanita dan Pemuda MCA menyatakan sokongan padu dan keyakinan penuh terhadap Datuk Seri Abdullah Ahmad Badawi sebagai pengganti Datuk Seri Dr Mahathir apabila tempoh peralihan kuasa berakhir Oktober tahun depan.

Wanita MCA menyuarakan pendirian tegas mengutuk sebarang tindakan oleh mana-mana pihak dari dalam dan luar negara yang membuat kenyataan tidak bertanggungjawab terhadap proses pertukaran pucuk kepimpinan negara.

Ketua Wanitanya, Datuk Dr Ng Yen Yen, berkata Wanita MCA yakin kemampuan Abdullah meneruskan pembangunan dan dasar Dr Mahathir yang berjaya meletakkan Malaysia pada tahap yang disegani masyarakat dunia.

"Kita menghormati keputusan Dr Mahathir, walaupun ia satu kehilangan besar bagi kita. Kita juga menerima baik keputusan menamakan Pak Lah sebagai penggantinya," katanya.

Pemuda MCA turut meluluskan sebulat suara usul menerima keputusan Perdana Menteri melepaskan jawatannya dan menyokong kepimpinan yang akan diambil alih oleh Abdullah.

(END)